

國朝耆獻類徵初編卷百七十七目錄

疆臣二十九

圖爾炳阿

李永書

白準泰

鶴年

子桂林

湯聘

吳達善

鄭大進

沈廷芳

劉藻

因陳書

國朝耆獻類徵初編卷百七十七

通奉大夫前署江西巡撫江西布政使司布政使湘陰李桓輯
疆臣二十九

圖爾炳阿

圖爾炳阿佟佳氏滿洲正白旗人雍正十三年由吏部筆帖式授
主事乾隆元年遷員外郎二年遷郎中三年遷甘肅兵備道五年
遷陝西按察使七年調山東按察使九年遷布政使十一年調雲
南布政使十二年擢巡撫十四年疏言改土歸流各府屬久設學
宮教職與編氓無異各土司亦俱敬順恐漢奸滋事飭令道府嚴
緝至未經向化者性最獷野各汛設兵防範嚴查出入并禁漢奸

竄入構釁及侵占其地疏入報 聞十五年五月疏言滇省常平倉穀係捐輸存項並無採買之款除照乾隆三年定額存貯穀七十萬一千五百石外應存溢額穀十五萬四千三十六石有奇滇省舉步皆山祇可畱本境出糶雖久易變亦須畱待價昂時糶賣以平市價未便因係額外一任州縣濫糶嗣後滇省溢額穀石令州縣於青黃不接時豫將市價詳報如價不甚昂則動額內之穀照例糶三存七原價秋收買補還倉價昂則照例糶額外穀石價值解司報部下軍機大臣議行十月因永嘉知縣楊茂虧空銀米不行嚴參經雲貴總督碩色奏劾 諭曰永嘉知縣楊茂虧空一案該上司既不覺察於平時及其敗露自應卽行嚴參究追乃上

下扶同徇私舞弊實出意外圖爾炳阿身爲巡撫竟行批結其欺
隱徇庇罪實難追著革職掣交刑部治罪尋部議擬斬監候十七
年十月得旨圖爾炳阿前在雲南巡撫任內不能察屬代爲彌
補部議照監守自盜治罪但尙與婪索肥橐者有間著加恩從寬
釋放是月授吏部員外郎十二月授河南布政使十九年六月調
山東布政使十月仍回本任二十年授河南巡撫二十一年六月
疏言滿營雇用漢人各省駐防皆同應令將軍副都統等責成理
事同知將各旗所雇漢人確查姓名籍貫交地方官備案稽察又
言河南息縣地方遼闊縣治四境相距均及百里縣令耳目難周
請將光州州判駐薄溪里之烏龍集鑄給關防俱下部議行十一

月調湖南巡撫十二月因奏辦運索倫兵丁口糧車輛等事奉
諭河南見有應辦軍需圖爾炳阿料理俱屬妥協著仍畱河南巡
撫任尋疏言豫省距陝甘較遠必俟軍需文移到後始行辦理勢
必貽誤莫若先將存麥撥分趕磨雇騾起運以赴急需 上嘉之
二十二年二月 上南巡籍隸河南之原任江蘇布政使彭家屏
接 駕奏夏邑水災 命圖爾炳阿查勘被水情形奏言收成均
係九分奉 諭該撫不免有文過之意切責之圖爾炳阿覆奏夏
邑去歲尙未成災奉 諭此可謂怙惡不悛矣尋 命步軍統領
衙門員外郎觀音保密訪得實 上以圖爾炳阿有意諱飾著革
職發往烏里雅蘇臺軍營效力贖罪四月夏邑民劉元德遮道控

知縣不職 上親加訊問供出生員段昌緒武生劉東震主謀指使圖爾炳阿會同侍衛成林查訊令知縣孫猷往拏於昌緒臥室搜得逆犯吳三桂偽檄一紙 諭曰朕從前降旨治圖爾炳阿之罪原因諱災今經辦出逆檄一事是緝邪之功大諱災之罪小且以如此梗不知化之人指使控訴欲去其縣令而卽爲之治其司牧者以罪是不益長刁風乎圖爾炳阿不必革職著仍畱河南巡撫之任會同方觀承妥協查辦四邑災務圖爾炳阿因有前此罪斥之旨遂心存成見有不能釋然災民者則是自取罪戾亦不能逃朕之洞鑒也但段昌緒既有此詩傳鈔彭家屏恐亦不能保其必無著方觀承前往會同圖爾炳阿嚴行詳查尋據方觀承等奏

稱審訊劉元德告賑時因彭家屏接 駕回家輒言此番 恩賑
由伊陳奏而得家人佃戶復在外張揚遂致劉元德等妄生覬覦
其呈詞伊姪彭型曾轉送閱看彭家屏已屬知情請革職審擬
上以方觀承等所辦非是夏邑永城等縣水災原因彭家屏陳奏
朕始得聞知是以飭令圖爾炳阿查明賑恤時卽令彭家屏同往
蓋地方遇有災傷處巡撫旣諱匿不報而本地紳宦能以實情入
告此正能體朕懷保小民惟恐失所之意至劉元德妄行叩闕究
出指使之生員段昌緒卽於伊家中搜獲吳逆僞檄因思彼地方
風俗敗壞泯絕天良藏匿者不一而足爰命方觀承等前往查辦
而召九卿面詢彭家屏卽供出有鈔存明末野史等三種夫使此

三書中果有悖逆詆毀之言而以官方面受恩數十年之大吏敢於鈔錄存畱其罪尙容誅乎卽指使劉元德叩闥屬實而主使之罪輕收藏逆書之罪重若僅如方觀承等摺中所奏則彭家屏本係朕令與該撫同往查災者卽使邀譽鄉井亦人情所必有何足爲罪明末野史等書乃彭家屏親筆開出書名何以並未查出該督等不詳究收藏逆書實跡專以劉元德控告一節定彭家屏罪案殊失輕重之宜尋軍機大臣會同九卿科道審擬彭家屏應斬決從寬改爲監候圖爾炳阿匿災事部議革職 詔畱任六月

諭來京候旨尋

命往烏里雅蘇臺軍營自備資斧辦理糧餉事

二十八年授貴州巡撫二十九年調湖南巡撫三十年二月患病

諭派侍衛噶爾炳阿帶同御醫二員前往診視三月卒

右 國史館本傳

李永書

公姓李諱永書字綬遠號芳園先世盱眙人自明指揮雄從成祖
北遷官於瀛州遂家焉祖父俱邑庠生以公貴 贈如公官公美
鬚眉豐頤長身有聰識強力遇事麻集乃益靜面不換色而徐徐
就理務出於善乃己雍正十三年拔貢生 廷試一等初宰福建
長泰縣調晉江晉江俗悍好鬪有施鄒者海梟魁也奪民婦劫商
賈財橫行白晝中公將赴任總督德公迎謂曰施鄒巨猾我已奏
聞 天子索之急卒未得柰何公偵知鄒匿女兄所而甚猛且多
黨遲則事洩乃於抵任日暗集健步弓手設伏環之而夜率役破
門入鄒方熟寢驚卽挾大槌走屋上拒捕或鉤其股以戟股斷顛

遂擒以徇遷泉州府西倉同知因公鑄級降補荆溪縣調常熟再
調元和又因公鑄級大府奏畱辦災題補武進縣累遷海州知州
蘇州知府蘇松巡道江蘇按察使又因公鑄級以病歸家居八年
卒年六十九公所到以強毅稱奸胥豪民望風警伏然中寬治獄
多平反浙省李家莊毗連吳郡羣匪竄焉號小梁山浙有司張其
事捕以兵民聚而囂飛瓦塘拒浙撫以叛 聞事下江南督撫總
督尹公檄公會鞠公見囚纍纍數百餓色焦然知有冤乃先給淖
糜徐受其辭部別首從流數人杖若干人獄遂平公聽州縣訟甚
敏片詞立決及任按察使每訊鞠款款數千言或申旦案猶牘畱
人以爲疑公曰州縣與民親中無隔閡得其情可以決遣臬司與

民遠矣自縣而府而司其閒文卷繁重吏胥鉗伺略有舛午動至
重辟我盡十分心猶未敢放一分心也卒以勘轉遲被劾而識者
觀其過愈知其仁尤長水利爲民計久長葺常熟之福山塘海州
之六塘河松江之五湖三泖皆有顯績民至今利賴之娶王氏再
娶郭氏俱封恭人子四女三葬曹家村銘曰
惟髮得櫛則統惟星在北則拱公能靜鎮物簡御宥故斂之爲沈
幾之智而放之爲仁者之勇嗚呼此其冢

右墓誌銘袁枚撰

白準泰

皇上御極之十有七年奸民構逆請假吏部尚書孫嘉淦諫章流傳山東巡撫白公獲一紙交臬司某窮竟其事務得主名再奏適滇省以聞臬司懼越奏之上疑公欺致公於理公之獄詞曰未得僞造者姓名遽妄奏臣不敢也且緩之則易於鉤考罪人斯得暴章之則彼或聞風竄伏而平民轉罹於事故隱忍不發此臣罪也擬大辟固當上憐其愚赦之發香山監工以老病卒公由筆帖式內府主事受知世宗累官福建將軍乾隆元年改官巡道公以疾辭上怒籍其家無長物得簿自出使迄入都公私出入纖毫如列眉上以爲廉授長蘆鹽政調兩淮公辜較引課辦

其贏縮不忸怩小利不責奇羨分利節度有不便輒弛以利民九年巡撫安徽先是廬鳳地磽陬多邀民饑卽避宅槃遊藉魚蠲鰲挈其孥搗小棟野歌乞錢或請禁之公憮然曰本之不清末胡能治命守令申畫郊圻課民耕貸給犂鋤外延染人機工教躡絲法畜蠶樹桃麻桑柘朝夕程督未期年民戀其業驅之不行今鳳潁滁亳所織絹帶絲布轉鬻蘇杭數州加兵部侍郎撫廣東調山西再調山東十六年 上南巡自德州至紅花埠凡十三營公修扞督治惟敬或勸拘虎豹備彈絃跼躑爲供奉者公大驚曰 皇上爲觀河省稼巡狩 聖書如日爲大臣者耳目未愼其可違 詔以非道悅耶除方物外無所貢泰山孔林外不置供頓清 蹕除